

## Kua Spil Bo ta Usa?

Tantu hende muhé ta gasta un eternidat dilanti spil. Mainta ora e ta lamta, su kabei por parse un eksploshon den fábrica di kolchon. Ma debí na su "santu pasenshi" dilanti spil, un transformashon milagroso ta tuma lugá! Despues di usa siertu marka di shampu i kondeshener, su kabes ta kubrí ku kleps di e tamayo preskribí, dunando aparensia di un kriatura di un otro planeta. Anto e ta soportá un tempestat di bientu kayente produsí pa un aparato deseñá pa e tortúra ritual aki. Awor e ta kla pa inisio di e obra di arte, e peñada ku el a selektá despues di un búskeda riguroso den diferente revista. Kada drachi mester ta n'é lugá apropiá. Ku e presishon di un pintor, e ta pinta na rant di su wowonan kompañá ku su koló spesial di meikòp na klèp di wowo. I no lubida maskara pa kabei di wowo i wènkrou. For di un variedat enorme e ta selektá presis e koló di lepstek ku ta dun'é un aparensia mas elegante. Puiru i rushi pa duna su kara e koló apropiá, kompletando e gran obra maestral kosmética!

Ma esei ta solamente un faseta di e dama su esfuersonan maratóniko pa hasi su kurpa mas atraktivo. Tin hisamentu di peso (yamá "eskultura di kurpa") i siertu gemnastik pa haña i mantené e forma di kurpa ku ta hala atenshon. Algun kandidata den sertámen di beyesa internashonal ta hasi uso di siguria plástiko pa bira mas bunita. Opinión aktual ta favoresé un aparensia demasiado slank, un kurpa insaludabelmente flaku segun médikonan preokupá. Konsekuentemente awendia anorexia (falta di apetit) i bulimia (kome di mas anto saka loke a ser komé) ta komun entre muhénan ku ta purba kopia e patronchi modelá.

Ma tin mas. Kuantu sèn i tempu ta ser gastá pa kumpra nèt e bisti ku ta hasié mas atraktivo òf sèksi. Tantu plaka ta bai pa diferente stail di sapatu òf di diferente koló. Hoyas no por hasi falta. Un òf dos renchi na un man ku huñanan tur di rushi no ta sufisiente mas awendia. Ademas mester tin siertu klase di renchi di orea i kadena pa garganta, pa man, i tambe pa pia.

Kuantu tempu, kuantu energia, kuantu sèn, i asta salú e yùfrou ta sakrifiká simplemente pa hasi su kurpa físiko mas atraktivo! Kon tristu!

Den e próksimo simannan nos isla lo gosa tres diferente sertámen di beyesa. Kada un ta konsentrá riba e bunitesa físiko di e sekso femenino.

Beyesa no ta malu. DIOS ta Esun ku a krea hende muhé i a dun'é un bunitesa ku E no a regalá e sekso maskulino. Pues, beyesa ta DIOS Su idea.

Ma den nos era, aparensia físiko a bira un opseshon, algu ku ta poseé nos mente. Ta imperativo pa nos kompéndé ku e mésun Dios ku a krea e beyesa tambe a enfatisá ku tin un bunitesa **muchu mas importante** ku esun físiko.

Beibel ta reta e dama: "Boso adorno no lag'é konsistí blo den aparensia so, den flègmentu di kabei i dòrnamentu ku kos di oro òf bistentu di paña, sino den hende su kurason paden, den un adorno ku no por kaba, di un spiritu suave i ketu, ku ta di gran balor den bista di Dios" (1 Pedro 3:3-4). Bunitesa físiko ta superfisial, pasahero, ta afektá e kutis i aparensia eksterior SO. Dios ke pa nos desaroyá bunitesa den nos ser interior, esta nos kurason, pensamentu, aktitutnan, i karakter. Esaki ta un bunitesa duradero ku ta sigui flora asta ora flor di hubentut ta marchitá, ora ploinan di biehes ta kubri kara. En kontraste di esun físiko, e beyesa aki no por ser pretendé ni ta un disfras kosmético. E ta un bunitesa 100% genuino; un beyesa ku ta "di gran balor den bista di Dios."

Kon nos por desaroyá e bunitesa aki? Dor di obedesé Skritura. "...si un hende ta skuchadó di Palabra (di Dios) i no ta kumpli ku n'é, e ta méskos ku un hòmer ku ta kontemplá su kara den un spil. Ma ora el a ripará su mes, e ta bai i ta lubidá unbes kon e tabata" (Santiago 1:23-24).

Na lugá di dediká tantu tempu dilanti spil pa tin un kurpa atraktivo, lo ta bon si nos lo dediká mes tantu tempu dilanti e spil penetrante di Dios, Beibel. Si bo ta tene kuenta ku loke bo ta opservá den e Spil ei, talbes lo bo no gana un sertámen di beyesa, ma lo tin kambio positivo genuino den bo bida, bo famia, i asta afektá nos komunidad!